

TE HEHEURAA API

I neia i te piha neneiraa Univereti i Roto Miti i Utah no te Ekalesia a Iesu Mesia i te Feia Mo'a i te Mau Mahana Hopea Nei i Papeete, Tahiti, i te mau fenua Sotaiete, i te mau avae atoa.

Nu. 7

Tiurai, 1918

Mat. 12

“E tia mai hoi te tahi fenua e aro mai i te tahi fenua, e te tahi basileia e aro mai i te tahi basileia; e o'e hoi, e te ma'i, e e aueue fenua i tera vahi, i tera vahi. E matame hai ana'e râ teie nei mau mea no te pohe.” Mat. 24:7, 8.

TE ATI IUDA.

O teie ia te tau e tupu ai ei parau mau te mau tohu e rave rahi a te mau peropheta, e haapapu-roa-hia'i to tatou tituri i te parau a te Atua. Ua itea i te Atua te matamehai e te hopea no te mau mea'toa. Aita hoi oia i vaiiho i te taata i roto roa i te pouri i te mau mea e tupu a muri atu. Ua pinepine râ Oia i te faaite atea maira e i te faaara hoi i te taata i te mau mea e tupu a muri atu, peneia'e o te haapao e ora'i hoi ratou ra.

Ua faaite atea maira Oia e e haapurarahia te Ati Iuda i roto roa i te mau fenua'toa o te ao nei, e riro ai ratou ei tâhitoraa e ei parau-ino-raa i rotopu i te taata nei. Ier. 29: 16, 17. Ua oti ê na ia i te faätupuhia ei parau mau, e te anoihia ra te ati Iuda i rotopu i te mau nunaa'toa i teie nei â, e ua hamani-ino-hia hoi ratou i roto i te tahi pae o taua mau fenua ra. Ua ore roa na te hau Ati Iuda i muri iti ae i te tau o te Mesia ra, e mai reira mai â aita i itea te hoê nunaa Ati Iuda i roto i te ao atoa nei, ua purara roa râ.

Ua faaite atea'toa maira hoi te Atua e e haaputuputu-

faahouhia ratou, e riro faahou atoa'i to ratou fenua Kanaana ei fenua heeuri e te maitai rahi, e to ratou basileia ei basileia hanahana. Ier. 33:7-12. I te matahiti 1841 ua tonohia Orosona Haida, Aposetolo, e te peropheta no te tau hopea nei o Iosepha Samita, i te fenua Kanana, e ia tae atu i te mou'a Oliveta ua haamaitai atura i te fenua Kanana no te ho'i-faahou-raa o te Ati Iuda i reira. E i te matahiti 1872 ua tono atura Birikama Iouna i e piti apose-tolo, o Tihoti Samita e o Lorenzo Tenoo, ei haamaitai i taua fenua ra ia ho'i mai to'na ra ruperupe e ia ineine no te ho'iraa te ati Iuda i reira e parahi tamau â. Ore noa'tu â te tahi hau Ati Iuda i te ao atoa nei, ua riro te mau Ati Iuda e rave rahi ei mau ona e ei feia mana rahi i roto i tera fenua e i tera fenua. E piti ahuru tiahapa matahiti i mairi a'enei ua amui taua mau ati Iuda tuiroo ra e rave rahi no te mau fenua'toa ei taiete e faaora i te Ati Iuda i hamani-ino-hia i Rusia e i te mau fenua i Europa hoi e faaho'i mai ia ratou i te fenua Kanaana e parahi ai. Ua haaputu ratou i te moni rahi, e mau milioni tiahapa te moni i aufauhia, e ua faateni ratou ra i te Sutana (arii no te fenua Turekia ia faatiamâ oia i te fenua Kanaana e tia'i i te ati Iuda e ho'i faahou ai i reira e parahi ai, no te mea ua auraro ia ia'na taua fenua ra.

Aita râ oia i faatia, e ua haere i te paruparuraa to ratou itoito e ho'i, e tae noa mai i teie nei. Aita to ratou hiaairaa e ho'i i haere i te itiraa, maori râ aita i itea te ravea e noaa'i ia ratou to ratou fenua a'ia.

Ua faaite atura te Hau Beritane i te hoê fenua rahi au maitai i Afarika e tia ia'na ia horoa na te Ati Iuda ei putuputuraa, aita râ te aau o te Ati Iuda i mahanahana noa'e ia parauhia te fenua Afarika ei putuputuraa. O Kanaana to ratou fenua a'ia, eiaha Afarika. O Kanaana te fenua i tohuhia ei putuputuraa, eiaha te tahi noa'tu â fenua. Mai reira mai â aita i pohe roa to ratou mana'o e ho'i i te fenua

Kanaana, te vai huru paru paru râ te itoito e tae noa mai i teie nei tama'i rahi.

O Turekia te tahi o te mau fenua e tama'i nei, tei te pae Purutia oia. No reira ua tonono ihora te Hau Beritane i te tahi nuu i roto i te fenua Kanaana, ua hemo to Turekia e ua riro ia ratou te oire Ierusalema e te fenua e ati noa'e, e ua opua e tiahi i to Turekia i rapae i te fenua Kanaana paatoa ra. Aita paha e maoro e faatiamâ-roa-hia te fenua Kanaana i te Zuko no te Turekia ra.

A haru ai te nuu Beritane i te mau fenua i ropu ia Ierusalema e te Miti Rahi ra, ua itea te mau ati Iuda e rave rahi te tausani mai Rusia mai i te parahiraa i reira, e i te faaapuraa i te fenua.

Ua mauia roa to ratou mau faaapuraa; ua hau i te maitai i to te mau fenua arii no Turekia i te fenua papu ra o Saron, e ua hau hoi i to Arabia. E mau fare parahiraa maitatai tei patuhia e ratou i te mau ofai no te mau fare marua tahito ra, ua tanuhia te mau raau tamärüraa, ua faanahonahohia te mahora i mua i te mau fare, e te fare puua tei muri. Ua putuputu parahi ratou i roto i te mau oire rii i fatata i te fare pureraa (Sunago) e te fare tai'oraa buka, e tei te atea rii to ratou mau fenua faaapu ra. Ua huru au to ratou ravea parahiraa, e te paturaa oire rii ra, e te faatea-rii-raa i te mau fenua faapu i to te feia mo'a i te fenua Roto Miti. Tei te tahi oire iti, o Rasona Le Tiona te i'oa, 1500 ati Iuda i te parahiraa. Ua haere taitahi noa maira teie nei mau Ati Iuda no ô mai i te mau fenua i haa-purarahia'i ratou ra, te rahiraa no Rusia maira.

E teie nei te tupu faahou nei i te rahiraa te mana'o o te ati Iuda no te ao nei e ho'i i te fenua Kanaana e parahi ai a fatu-faahou ai i te mau vahi ano. Te mahanahana faahou nei to ratou aau a haamana'o ai ratou i te parau tohu tahito no te putuputu-faahou-raa i reira ra. I te afa matamua no teie nei matahiti 1918 ua reva'tura hoê ahuru tausani faehau ati Iuda no roto mai i te fenua Amerika, e tere

atu ratou i te fenua Kanaana e tauturu i te nuu Beritane i te faatiamâraa i to ratou fenua a'ia ra ia Kanaana. E teie te parau maere i taua nuu ati Iuda rahi ra, oia hoi ua parauhia e ua faau ratou ana'e i te parau hou to ratou revaraa e parahi tamau â ratou i te fenua Kanaana i te hoperaa o teie tama'i rahi. Ua opuahia e te ati Iuda e faaitoito â i te faataafaa i te nuu rahi ati Iuda no roto mai i te fenua Amerika ei mono i te nuu Beritane i Kanaana, e noaa faahou mai ai to ratou fenua mau ei parahiraa.

E mea maere rahi ia aita i moe roa te hiroa ati Iuda i te maoro o to ratou purararaa i roto i te mau fenua êê, te vai taa ê noa'tu a ratou ra te huru â te huru. E mea maere hoi aita i pohe roa i roto i te hanereraa o te matahiti i mairi a'e to ratou mana'o e ho'i i te fenua Kanaana e parahi tamau ai. Oia ia, e ohipa maere roa ia te ohipa a te Atua e te mau ravea e tupu ai to'na mau opuaraa.

—*Farani Tuterera.*

E TOHU NO IUDA.

Ei reira, te mau toea i purara ê i te mau fenua atoa ra e haaputuputuhia'i mai te hitia o te râ e mai te tooa o te râ, mai apatoa e mai apatoerau ra; e e faataehia ratou i te ite i te Fatu ra i to ratou Atua, o tei faaora ia ratou. E e haapue au i to'u mau taata mai te taata e haapue i te ruru sitona i nia i te vahi papairaa. Ei reira e haamana'o ai au i te faufaa ta'u i fafau na i to'u ra taata, i te na ôraa'tu e, Ei ta'u ra tau mau e haaputuputu mai ai au ia ratou i te vahi hoê; e e horoa fahou atu vau i te fenua o ta ratou hui metua ei a'ia no ratou, oia te fenua ra o Ierusalema, o te parauhia ia no ratou e a muri noa'tu, te na reira maira te Metua.

E teie nei, e parau atu vau ia outou, e tupu mau taua mau taua mau mea nei, i ta te metua i faaue mai ia'u. Ei reira e faatiahia'i taua faufaa ta te metua i fafau i to'na ra taata; ei reira, e parahi faahou ai to'u ra taata i Ierusalema, e e riro ia ei a'ia no ratou ra. 3 Nephi 20:13, 18, 29, 46.

Te Evanelia i A'ohia Mai e Iesu Mesia ra.

Te na ô mai nei to te ao. Ei aha e'a hoi te hoê Evanelia apî? Aita anei i navai te mau Evanelia i te ao nei i teie nei mahana? Ei aha e'a ia teie Evanelia apî huru ê roa o te papaina pinepine mai i roto i to tatou mau tari'a i teie nei tau apî? E tia anei ia parau e i roto na tenetere e rave rahi i mairi a'enei te vai noa ra ia te poiri i roto i teie nei ao mai te itea orehia te maramarama no ô mai i te ra'i? E mai te mea e e tia ia tatou ia parau i te reira parau, eaha ra ia te tumu? Ua huru ê anei te Atua? E Atua hirohirouri anei Oia, e haapao anei Oia i te huru o te taata? Te na ô maira Mataio, "Te haapii nei te Atua i te parau mau mai te hirahira ore i te taata atoa." Te faaite papu atu nei matou e, aore roa te Atua i huru-ê-hia. Ta'na ra mau ture i haapiihia mai e Ana ra i mutaaibora, te vai nei â ia i teie nei mai te huru i tahito ra. O te taata râ tei huru ê hia. Ua faatia te taata i te parau i parau ê hia na e Isaia ra a na ô mai ai oia e "Ua viivii te fenua i raro a'e i te taata ra, ua hapa ratou i te ture ra; ua ruri-ê hia e ratou tei haapaohia ra; ua pi'o ratou i te faufaa haapao-tamauhia ra." Isaia 22:5.

Ua taiva ê atu na te taata i te Evanelia a te Mesia. Ua faahuru-ê-hia te mau tumu parau mo'a ra. Ua taparahihia to'na ra mau tavini e te vai ra te hoê tau i muri rii iho i te Mesia ra i ore roa'i te hoê o to'na ra mau tavini o tei mau i te autahu'araa mo'a i ora mai. O te tumu ia i rave-ê-hia'tu ai te Evanelia i te ra'i ra, e haamonohia ibora ta te Atua mau ture i ta te taata. Te na ô maira te Aposetolo o Paulo: "Te vai atura hoi te tau e ore ai ratou e farii ai i te parau mau, no te anoenoe o to ratou tari'a, e haaputu ia ratou i te orometua i au i to ratou iho hinaaro; e fariu ê hoi to ratou tari'a i te parau mau, a apai tia'tu ai i te fabula." II Tim. 4:3.

E ere anei mau ia te huru mau o to te ao nei i teie nei

mau mahana hopea nei? Te taiva noa ê atu nei ratou i te mau papainaraa i te mata'i, "Te fatata atu nei ratou i te Atua i to ratou vaha i te faatura'tu nei ia'na ra i to ratou utu, tei te atea ê râ to ratou aau." Mataio 15:8

Te mau haapaoraa e haapii atu i te mau ture au ore i te evanelia mau a te Atua ra, e faahapahia ia ratou, e ore atoa ia e tia ia ratou ia tomo i roto i te basileia o te Atua ra na roto i taua huru haapaoraa ra.

Eaha ra ia te ravea e ora'i tatou. Ua faaruehia anei tatou e te Metua ra ma te papu ore? E faaho'i-faahou-hia mai anei taua autahu'araa i rave-ê-hia atura? Te na ô maira Daniela i te pene 2 irava 44, "I te mau mahana a vai ai te hoê mau basileia o te taata nei i teie nei ao ei reira e faatupu ai te Atua o te ra'i ra i te hoê basileia o te ore roa ia e mou." Te na ô atoa maira Ioane te Aposetolo, "Te ite ra oia i te hoê melahi i te maueraa na ropu i te reva nei: ma te Evanelia e tia i te vairaa ra ei pororaa'tu i te feia e parahi i te ao nei ra, i te mau fenua atoa, e te mau opu atoa, e te mau re'o atoa, e te mau nunaa atoa. Apokalupo 14:6, 7. E taua evanelia ra o tei iteahia e Ioane i te afairaahia mai e taua melahi ra, e porohia mai ia i te mau nunaa atoa e ore roa te hoê basileia e ore i te faaroo i taua parau mo'a ra.

E a'ohia te mau taata atoa i te mau vahi atoa ia tatara-hapa e faafariu mai ratou i te e'a e te ora mau. Ua taa ia tatou e, te mau maira te hoê melahi mai te ra'i mai, e te ohipa a taua melahi ra, o te afai mai ia i te evanelia tei rave-ê-hia'na i nia i te ra'i. Ua papu maitai ia tatou e ua tae mai taua melahi ra e te evanelia atoa i teie nei mau mahana hopea nei. O vai râ ia e teihia hoi te mau feia to taua melahi a ta Atua ra i fâ mai? Ia ore tatou ia ite e, o vai taua mau feia ta te melahi i fâ maira e vai noa â tatou i roto i te poiri taotao. E ei haamaramaramaraa i te hoê mau vahi no taua evanelia ta te melahi i afai maira no to te ao nei e hi'opoa

rii â tatou i te parau ta Paulo i parau maira. Te na ô mai ra oia i to'na ra episetole i te Ephesia i te pene 4 irava 11. "E ua haapao oia i te tahi pae ei aposetolo, e te tahi pae ei peropheta, ei te tahi pae ei haapii evanelia, ei faaau i te feia mo'a i te ohipa ra e orometua, ia tupu i te maitai te tino o te Mesia ra." Eaha ia te maoro e vai mai ai taua mau toroa nei i roto i te ekalesia o te Mesia ra? Te na ô maira Paulo, "Ia riro tatou atoa nei ei taata paari, i te faaroo, hoê e te ite hoê i te Tamaiti a te Atua, ia taea te faito ra i te î o te Mesia i te rahi." Te vai atoa ra te mau tapao e pee na muri iho i taua evanelia ta taua melahi i afai mai ra, "E tia-varu atu i te Demoni i rapae, e parau i te re'o êê, e tuu i te rima i nia iho i te upoo ei faaoraraa i te ma'i. etc. Ia hi'opoa maitehia, te mau haapaoraa atoa e vai nei i te ao nei i teie nei â mahana, e ite anei ia tatou e, teihea te hoê no rotopu mai i taua mau haapaoraa ra o tei au mai i te hoho'a o taua evanelia ra, ta taua melahi ra i afai mai. Aore roa te hoê i rotopu i na Ekalesia e ono hanere e vai i te ao nei e haapao nei i te mau ture a te bibilia, maore râ e, o taua Ekalesia o tei faatiahia e te Mesia, na roto i taua melahi o tei fâ mai ia Iosepha Semita ra, oia hoi, te Ekalesia a Iesu Mesia i te Feia Mo'a i te Mau Mahana Hopea Nei i parauhia Ekalesia "Momoni". Aore te hoê o taua mau Ekalesia êê ra i faaite mai e ua fâ mai ia ratou taua melahi i itehia e Ioane aposetolo ra. E na roto hoi i te hotu o te raau e ite ai tatou i te huru o taua raau ra. E taua evanelia nei, hoê â ia evanelia o tei a'ohia mai e Iesu Mesia i mutaaia hora. O te evanelia matamua ia o tei faaho'i-faahou-hia mai i te ao nei e na roto hoi i taua evanelia ra e roaa mai ai ia tatou te tatarahapa tia mau, e farii atoa ia tatou i te bapezitoraa utuhi no te haamatararaa i te hara, ia farii tatou i te tuuraa i te rima ei fariiraa i te Varua Maitai, e i reira tatou e tae atu ai i te faito ra i te î o te Mesia ra, e mai tei parauhia e te Fatu ra. O

te mau maite ra e tae noa'tu i te hopea ra o te ora ia. Te ani atu nei te Ekalesia a Iesu Mesia i parauhia Haapaoraa Momoni, ia tatarahapa te mau taata atoa e faafariu mai i roto i te e'a o te ora mau.

“E te ere ra râ te hoê o outou i te ite e ani oia i te Atua ra, o tei horoa hua mai i te maitai i te taata atoa ra ma te patoi ore; e e horoahia mai ta'na. E ani râ oia ma te faaroo, eiaha e feaa. Iakobo 1:5. Ua na reirahia na taata e rave rahi mai ta Iakobo i faaite mai ra, e ua roaa ia ratou i te pahonora a i ta ratou mau pure ma te faaite mai ia ratou e, o taua melahi ra tei iteahia e Ioane aposetolo, ua afai mai oia i te Evanelia a te Mesia ra. No reira e hoa ino ma e, no te aha outou e ore e faahaehaa'i i to outou mau aau i mua i te aro o te Fatu mai te ani atu ia'na ia haamaramarama mai oia ia outou atoa na i te parau mau. Ia na reira outou e tae oioi ai tatou atoa i te faaroo hoê e i te ite hoê i te Tamaiti a te Atua, mai te hoê â faito i te i o te Mesia. E noho ia tatou i roto i te aroha mau, e aroha atu tatou i te tahi e i te tahi mai te oaoa hope ore. Ia tae i taua mahana rahi ra e ore ia e tupu faahou te ati i te fenua nei e ore hoi i tupu te tama'i i rotopu i to te ao nei. E mata na râ outou i te imi i te basileia o te Atua e te parau tia na'na e amui-atoa-hia mai taua mau mea ra ia outou. *Ioane Monika.*

Tera Mai Nei te Hoê Mau Tapao o tei Faaite Mai e te Fatata Mai Nei te Tae Pitiraa Mai o te Mesia.

E mai tei te anotau ia Noa ra, oia atoa ia tae i te anotau o te Tamaiti a te taata nei.


E mai tei te anotau ia Lota ra; te amu ra ratou e te inu ra hoi, te hoo atura, e te hoo maira, te faaapu ra, te faatia ra i te fare;

Oia atoa ia tae i te mahana e fa mai ai te Tamaiti a te taata nei. Luka 17:26, 28, 30.

E te aueue rahi i te fenua i tera vahi, i tera vahi, i te o'e hoi, e te ma'i rahi, e te mea mehameha e te semeio rahi i te itearaa i nia i te ra'i. Luka 21:11.



O te hoe ofai ei tii i hamanihia ei faahaamana'o ia Hairamu Samita. Tei roto i te aua hunaraa ma'i teie ofai i te faatiahia.



O te man hiero matamaua i fatiahia e te Ekalesia nei.

Na t
muri
outou
no te
ia'u
nahai
noa't
E 24
ohipa
pine
haere
to'u a
outou
riro i
teie n
ra.
E
hoi i
riaria
hopea
rave
huru.
T
mau h
T
ra? U
te mân
Ua ra
hotu a
O vai

Roto Miti, Te 19 no Mati, 1918.

Na te Feia Mo'a i te Mau Fenua Moana,

Ia ora na tatou i te aroha vai-maite-raa no te Atua, e a muri noa'tu.

E huru moaro iti a'enei aita vau i papai i te rata ia outou na, e tau mau hoa here e, aita hoi i papai i te parau no te "Heheuraa Api."

Te tumu i ore ai e ere ia i te mea ua moe roa outou na ia'u nei, aita hoi to'u aau i haere i te toetoe, te vai mahanahana noa râ, e eita hoi to outou hiroa e moe ia'u e tae noa'tu ua farerei faahou tatou i te ao hanahana a muri atu. E 24 hora i roto i te mahana hoê, tirara ia; ia i te reira i te ohipa, atira noa'tu; o te tumu mau ia aita vau i papai pinepine ia outou na. I te mau vahi ta'u e hahere ra, te afai haere atoa nei i te Bibilia i te re'o Tahiti, e mahanahana to'u aau ia outou na i te tai'oraa i te tahi mau irava iti i to outou re'o i tera taime i tera taime. Na te Evanelia i faariro ia tatou ei mau hoa tamau tuua ore. E tahi ia hotu teie no te Evanelia, e faariro i te Feia eê ei hoa here tamau ra.

E mau tau ati peapea rahi teie, mai ta Iesu e Paula ma hoi i parau ra. 2 Tim. 3:1-6. Mat. 24. No te rahi o te ati riaria i tera fenua i tera Fenua i teie nei mau mahana hopea nei te haamana'o pinepine nei au ia outou na, e e rave rahi te uiraa i tupu i roto ia'u, mai teie atoa nei te huru.

Te mau papu anei i te faaroo? Ua itoitoe anei i te mau haapiiraa e i te mau pureraa hoi?

Te here anei te tane i te vahine, e te vahine i te tane ra? Ua haapiihia anei te mau tamarii? Ua ore roa anei te mârora e te feii? Te manuia anei te hôpuraa pârau? Ua rahi anei te auhune no te pufaa, te vanilla, e te mau hotu atu â hoi? Ua haere anei te mau tane api i te tama'i? O vai te oto e o vai te oaoa? Ua navai anei te maa e

etaeta'i te tino? O vai te roohia mai e te poia? Te tauturu anei te feia tao'a i te feia maa ore? Ua faatau anei? Te parahi anei mai te hau i te faarueraa i te mau mea i faao-rehia ra, oia te ava, te eiâ, te haavare, etc., etc.,? Ua faao-rehia anei te mau hara e ore e au ia parau ra? Te anaana anei te mata i te maramarama? Koh. 8:1.

E riro teie nei mau feruriraa nâ'u nei ei tapao te vai nei â tōu mana'o ia outou na, taa ê noa'tu tatou i te moana rahi hohonu ra. Ia mau papu tatou i te parau mau e tae noa'tu i te ora mure ore ra; atira ia parau.

Te amui mai nei o Maria, e o Dora, e o Tifira, e o Mitona, e o Eunita, e o Melevina, e o Mitila, ta maua ia mau tamarii, i te parauraa e, Ia ora na tatou e tae noa'tu i te hopea roa ra.

Farani Tuterera.

Ua haamou-faahou-hia te oire Guaatmala, na te hoê ueueraa fenua taua ohipa i rave. O te toru teie o te taime i pau taua oire ra, i teie nei taime râ aita roa'tu te hoê fare i tia mai.



TOAE A MAERE, Faaau Parau, Rue Dumont d'Urville, Orovini, Papeete, Tahiti.
ERNEST C. ROSSITER, Imprimeur, Rue Brea et de la rue Damont d'Urville, Papeete, Tabiti.